



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7 Yangia anidakangma : Tir Yimiyim

tiryimiyim@aolima

tir yimiyim

TAPAK 8

**Cambodia PM Hun Sen-
i mapa toktsütsü**

**Japan Open: Sindhu tsükogo; Rankireddy
o Shetty na 2buba round-i iogo**



VOL. XX NO. 284 (ADOK 284) DIMAPUR YANGTEPNÜ (THURSDAY) CHITENI (JULY) 27, 2023 ₹ 5.00

I.N.D.I.A. MP temi tanü süoshi tanak subotsü

New Delhi, July 26, 2023 (Agencies): Centre-i Manipur atema teinyaksü meinyakba atema opposition teloktep- Indian National Developmental Inclusive Alliance (I.N.D.I.A.) züngsem ajaki Brihostibarnü parliamentary session nung süoshi tanak agitsü.

Prime Minister Narendra Modi-i Parliament session nung Manipur indang ola madokba atema tejashi sayua I.N.D.I.A. MP ajaki süoshi tanak subotsü lemtet.

Bodbarnü Lok Sabha Speaker Om Birla-i sorkar anema no-confidence motion agizükogo. Iba motion ya Congress-i opposition teloktep nung benoka liasü.

Political party ajak nungi lennirtem dang asüngdangyaba sülen ang iba motion jembitsü atema anogo lemtetsü ta Speaker Birla-i ashi.

Opposition-i sorkar dang ontük aika atema tejashi sayudang

süoshi tanak subor. Opposition-i Prime Minister Modi dang Parliament nung tamasa Manipur indang jembitsü akhanger.

Iba takhangba magizükba ajanga Lok Sabha aser Raja Sabha nung session shitak magiteti arur.

July 20 nungi Monsoon Session tenzük aser August 11, 2023 nü tembangtsü sentong lir.

ARMY GARI

RONGDOKTSÜR 9 APU: Imphal, July 26, 2023 (Agencies): Manipur kübok Kangpokpi district nung central security forces indang gari ana rongdoktsüba dak sendakba nung tanur ka dena nisung 9 puogo.

Sepaitem indang bus garitem ya Nagaland kübok Dimapur nungi aruba liasü. Ajisüaka nisung telok kati NH 2 nung Sapormeina tesem anasa garitem anendaksür mi senoktsü. Ajisüaka iba lendong nung nisung yiruba osang kecha mali.

ASU-i Kohima tobur jungdaksünür

Kohima, July 26, 2023 (TYO): Angami Students' Union (ASU)-i Kohima tajungba kümdaktsü mechi nung "Cleaner Kohima, Healthier Kohima" omen kübok Cleanliness Awareness Drive ka agiogo.

Bangdakpurtemi state yimtiba tobur jungdaksütsü atema mapa inyakba nung yarisema ASU-i Kohima jila kübok tesem balala nung signboard 60 shi yutsüogo.

ASU-i "My Trash My Responsibility", "Cleanliness starts from you", "One who maintains cleanliness keeps away diseases", "Adopt Cleanliness as a lifestyle" amala tezülubatem zülur yutsüogo ta ASU president Khriesamhalie David Mere aser vice president Thejalkhoukho Khawakhrie nati ashi.

ASU-isa nübertem dang Kohima yimti merüka ayutsü

aser kaketshirtem dang tim mapa inyaksü tayongzükba agitsü.

SORKAR GARI AMSHIBA MITAAO

ASU-isa June 13 nü sangoktsüba "Students Code of Conduct" nung ajemdaker Kohima nung sorkar garitem amshia school tanurtem anishiba indang awareness drive ka agi.

Iba mapang sorkar gari 53 tashi kaketshirtem aser public anishiba angu aser parnok dang iba mapa meinyaksü ashi ta ASU ketdangpurtemi ashi.

Non-governmental organization (NGO) kati sorkar dak sendakba inyakyim yanglua inyaksü makok saka timi dang gari kiburtem dang kaketshirtem manishitsü shiogo. Parnok dang state indang rongsen pei nija mapa atema mamshitsü metetdaksü ta ASU-isa ashi.

Manipur nung political party 10-i Governor den ajurutepe

Imphal, July 26, 2023 (Agencies): Manipur nung political party 10-i Bodbarnü Governor Anusuiya Uiquey den ajurutepe Manipur State Assembly special session ka jazüksü takhangba agitsüogo.

Külen, Lt. Gen. HS Sahi, GOC Headquarters, 3 Corps den Major General Rajan Sharawat, Inspector General of Assam Rifles (South) nati Governor Uiquey den ajurutepe security tensa osang lemsatetep.

Commander Lt. Gen. HS Sahi-i Governor dang Manipur nung kechi tensa ajurudir Army renema aliba osang ashi.

Ano, Vice Chancellor Prof. N Lokendra Singh-i anir Manipur

University Peace and Normalcy Restoration Committee telok kati Governor den ajurutepe University indang osang lemsatetep.

Manipur University-i relief camps balala nung alirtem yariba indang parnoki Uiquey dang ashi.

Manipur University nung summer break sülen normal classes tenzükba aser undergraduate courses indang tatidang agiba osang Prof. Lokendra-isa lemsatetep.

Manipur University Peace and Normalcy Restoration Committee-isa state nung yimjung aser tensa süngjemtsü atema tebilemba kar züluba shidi ka Governor Uiquey nem agitsü.

Nagaland Police central store nungi injang auya yokdokba putet

Dimapur, July 26, 2023 (Agencies): Nagaland police indang Central Store nungi injang ayoktsü merangba atema police Inspector ka den nisung pungu puogo.

"Iba maparen nung tongti süa tai tongloksüsangji inspector Michael Yanthan ta jangaogo aser paia injang auyaba aser ayokba nangzükogo" ta Dimapur Commissioner of Police, Kevithuto Sophie-i ashi.

Ajisüaka injangji shiba dang yokdokar ano memetet. July 9, 2023 nü stock verification mapang injang auyaba putet aser iba anogo nungi bushisüngdangtsü tenzük.

Police-i NH 29 kübok tesem balala nung checkpoints lapoker

mita ao saka mezüng anogo shinga pua marutet. July 10 nü police-i Chumoukedima kübok 6th Mile area nung gari ka soter mita reprangdang jang bosta asem nung injang aika miima bena aliba angu, ta Commissioner of Police-i ashi.

Iba atema nisung ana apu aser tena dang asüngdangya asüdag NSCN(IM) nung züngsema aliba asür ka kinungtsü kidang nungi injang abenba nangzük.

Iba nung ajemdaker police-i tetsür la apu aser lai NSCN(IM) deputy kilonser ka ket nungi injang anguba nangzük.

Police-i NSCN(IM) deputy kilonser dang asüngdangya asüdag Police Central Store

nung Arms and Ammunition Branch in-charge Michael Yanthan dang nungi injang alizükba osang lemsatetep. Iba sülen NSCN tanishir apu aser Michael-ia injang auyaba aser yokdokba nangzük.

"Nisung kati SLR ammunition indang 1500 rounds aser INSAS rifles indang 5.56 mm calibre bullets (1000 rounds) alitsü atema pa nem Rs 4.25 lakh agütsüba Michael-i nangzük" ta Sophie-i ashi.

Iba sülen ano nisung ka puogo. Iba ken o atema Special Investigation Team (SIT) ka tentetogo aser parnoki maneni bushisüngdangtsü ta Dimapur Police Commissioner-isa metetdaksü.

SC-i Nagaland IAS ketdangsür temepishiba magizük

Kohima, July 26, 2023 (Agencies): Nagaland cadre Indian Administrative Service (IAS) ketdangsür Reny Wilfred-i pa anema benoka aliba ken o tangaleni belentsü atema mepishiba Supreme Court-i magizük.

Iba ken o ya 2021 küm Protection of Children from Sexual Offences Act (Posco) kübok benoka lir. Reny Wilfred-i Noklak district nung deputy commissioner inyakang tanur

tetsür ana dak tim mesüi kongshiba atema pa anema ken o benoka lir.

Wilfred ya 2015 batch ketdangsür ka lir aser tang ya pa Nagaland sorkar Finance Department nung Joint Secretary lir.

Yaküm Wilfred-i Gauhati high court dang Tuensang district nungi tanga special court kati pa anema benoka aliba Posco ken o belentsü asüngdanga liasü. Pa taküm lendongi aitsü akok aser

ochi obendang mangutsü ama bilemer ta Wilfred-i okadak ashi.

Ajisüaka, yaküm April ita Guahati High Court-i iba temepishiba magizük aser iba jagi pai Supreme Court dangi kasa temepishiba aben.

Supreme Court nung justice Aniruddha Bose aser justice Dipankar Datta na adenba bench kati Reny Wilfred indang special leave petition magizük aser interim stay ka agüja aliba agienogo.

Raj Bhavan nung 24 buba Kargil Vijay Diwas among



Dimapur, July 26, 2023 (TYO): Bodbarnü Dr Imkongliba Ao Hall, Raj Bhavan, Kohima nung 24 buba Kargil Vijay Diwas mongogo.

Iba sentong nung Nagaland Governor La Ganesan aser Kargil War Veterans, Veer Nari/Next of Kin (NOK), Army officers, Jawans, kaketshirtem, CSO lennirtem aser Raj Bhavan staff among.

"May 5 nungi July 26, 1999 tashi India sepaitemi Jammu and Kashmir kübok Kargil nung kanga dang tasü itta, linük meima aser bendanga agüja Pakistani Army ket nungi India nung lushi meyipa agitsü raraba atema Governor Ganesan-i tenüngsang agitsü" ta PRO, Raj Bhavan Kohima sangdong ka nung ashi.

"Kargil Vijay Diwas ya July 26, 1999 nü Kargil rara tembangba bilemteta amonger. Tasütait sepaitemi asen tarutsü atema bendanga agüja raraba atema tenüngsang agitsü. Nagaland nungia tasütait sepaitemi iba rara nung tangari tatishitsü agitsüsa shilem agiba atema pelar" ta Governor Ganesan-i ashi.

Küm 24 tejakdang Kargil tenemtem nung Kargil rara takok anguba otsü zülua yutsüba tarutsü putu aika mesamatsü, ta paisa ashi.

Governor Ganesan-isa Nagaland nung alirtem ajak tenüng nung Mother India sepaitem nem tetushi agitsü. Paisa Kargil War Veterans nem appreciation certificate agitsü.

Iba sentong nung 1st Assam

Rifles Commandant Col. SBB Sharma-i tesentepertem pelaa agizük aser Kargil Vijay Diwas indang osang lemsatetep.

Kargil War Veteran Sub. Chankhothu aser asür Capt. N Kenguruse, MVC tebu Neiselie Kenguruse natia o jembidang Governor aser Army ketdangsürtemi sentong tulu ayongzuka sepaitem nem tetushi agitsüba atema pelaba metetdaksü.

Iba sentong nung DGP Rupin Sharma IPS, DC Kohima Shanavas C, DIG CRPF, Director Rajya Sainik Board aser NCC ketdangsürtem aden aser Maj. Gen. Vikas Lakhera, SM IGAR (N)-i anküp tepela o jemi ta PRO, Raj Bhavan Kohima-i metetdaksü.

Longjem Society ajanga 'Tsongremmong Saalak' ayonger



Noksa nung Tsongremmong Saalak ayonger Longjem Society nungi (achichilen nungi) DJ Tali, Sound Technician; Sentimeren Pongen, Event Manager; Lokti, member aser Moalemba, Longjem Society tir angur.

Dimapur, Chiteni/July 26 (TYO): Asen ayak wazüka ayutsü aser lanurtem dang asen sobaliba tajung sayutsü aser kin balala tsungta telungjem nung aliba benjongtsü nükjidong nung entertainment industry balala nungi lanur aser sempet tajung aliba artist tem nem sapang aser maongka agüja Longjem Society, Dimapur ajanga 1 buba 'Tsongremmong Saalak' sentong ayongzüka agitsü lir.

Iba sentong ya Urban Haat,

Dimapur nung August 1, 2023 nikongdang 7:00 ako nungi 9:00 ako tashi alitsü.

July 26, 2023 nü Signal Angami, Dimapur nung aliba Ao Kaketshir Telongjem Dimapur indang Commercial Building nung osangbener den jembidang Longjem Society nungi Event Manager Sentimeren Pongen-i ashiba agi, Aor temi alu wadang nung meranga inyaker arutsü lia Tsongremmong benjong ya amunger.

Tsongremmong Saalak tetetzü temolung ajak agi pela aser südoksünema Tsongremmong amungba dang ajar, ta pai ashi.

Iba sentong nung Aor kising masü saka kin ajunga nungi pelashishia jaoker aser iba sentong nung adentsü atema ticket ka nung sen 200 alitsü aser iba den ticket alir atema 'Tsongremmong Lucky Draw' ka asayatsü, ta pai ashi.

Iba Tsongremmong Saalak nung kentener Sunep Lemtur, Tiameren Aier, Chubatsur Jamir, Lenen Jamir aser MJ Jamir den ano Dreams Unlimited nungia shilem agitsü. Iba sentong nung Naga nung choiyongtsü angudak food stall tem lapoktsü.

Timtem aser makamait tia nung alirtem yaritsü nükjidong nung iba Longjem Society ya küm ana tejakdang tenteta sentong balala ayongzüka timtemtem den yariteper, ta ashi.

Iba Tsongremmong Saalak atema ticket ya Four Season Hotel aser MI Printers, Notun Basti nung angutsü aser ano tejangrar temi mobile number 8794399471 ajanga tongteprateptsü akok.

Nagaland nung 'Ta Dhom' project semzükogo

Dimapur, Chiteni/July 26 (TYO): Advisor to the Chief Minister aser Chairman, Investment & Development Authority of Nagaland, Abu Metha-i July 26, 2023 nü RCEMPA, Jotsoma nung 'Ta Dhom' project semzükja liasü. Iba Ta Dhom project atema Hip-hop aser Beatbxing genres nungi kentener nisung toku shimteta lir.

Ta Dhom project tenzüksang Viveick Rajagopalan-i ashiba agi, Ta Dhom ya oshi balala nung rap ken atenba project ka lir aser oshioben aser sobaliba balala nung atentsü.

Iba project Nagaland nung tenzüksü atema Theja Meru den 2019 küm jembia liasü aser iba project ajanga kin balala tsungta apu laa sendakteptsü imlar, ta pai ashi.

Task Force for Music & Arts (TaFMA) ajanga mapa tajung inyakba atema pelar aser kentener dang agizüksü kising masü saka parnok angazükba tem lemsateptsü aser meyipa agütsü ajungshia liasü. 'Ta' aser 'Dhom' ya alima ana, shisatsü ana aser sobaliba ana

temaitsü lir. Advisor to the Chief Minister aser Chairman, Investment & Development Authority of Nagaland, Abu Metha-i, Nagaland aser Northeast nungi lanurtem dak sempet aser tashi ya ajak den sako lir, aser parnok DNA nung kenten-menü aser tsüingsangba keta lir, ta ashi.

Nagaland nung sobaliba tajung ya parnok indang ken aser tsüingsang tem ajanga sayur, ta pai ashi.

TaFMA ya Special Purpose Vehicle ka lir, koba kenten-menü temaba jenjangi ajungkettsü, entrepreneurship ajungkettsü aser Nagaland nung kententsü jangrar nem shisa agüja parnok mangdang asangsang kumdaktsütsü mechi state sorkari tentet, ta Metha-i ashi.

Northeast nung kin 200 dak tema liaka yangji telongjem alibaji tashi ka lir, aser Northeast-i alima asoshi inyaktettsü jenti lir, aser maongka dang agütsüra, Nagaland aser Northeast ajanga India tali temaba jenjangi ajungkettsü, ta pai ashi.

National aser international

jenjang nung lanur temi takok balala anguba indang lemsatepba mapang, item lanurtem ya Naga Ambassadors ama kumogo, ta ashi.

TaFMA ya yakbang sür institution aser artist balala den longjemer lanurtem nung tematiba jenjang nung sapang agütsür. Aser ano maneni sorkari kentener nem sapang aser maongka agütsütsü aser TaFMA nungi telok kati Spain nung taruba WOMEX (Worldwide Music Expo) nung shilem agitsü, ta pai ashi.

Taruba Asia Music Summit ya Nagaland nung ayongzüksü, ta Metha-i shia liasü.

Ta Dhom project nung Naga 'flavour' inoksemba ajanga takok angutsü aser state sorkaria yaritsü, ta pai ashi.

Iba project nungya Indian rhythm, taals, Naga chants, vocal singing alitsü, ta TaFMA chairman, Theja Meru-i ashi.

Naga nung kentener dak sempet tajung lir asünung, iba ya ajanga linük aser alimai Nagaland nung sobaliba tajung angazüksü imlar, ta pai shia liasü.

Mangmetong Tsongremmong nung Governor adentsü

Dimapur, Chiteni/July 26 (TYO): Aor tem alu arutsü lia amungba Tsongremmong benjongmung Mangmetong yimdak August 2, 2023 nü amungtsü lir. Iba sentong ya Nagaland Governor, La Ganesan nem akum agüja Mangmetong Village Council ajanga ayongzüksü.

Iba benjongmung nung Governor den külemi Nagaland Deputy Chief Minister, Y. Patton adentsü.

GHS Mangmetong kaketshir

temi ainer tem agizüksü aser iba sülen lanurtemi parnok Er. Akangmeren Playground, Mangmetong bushia meiner aotsü.

Iba sentong nung Advisor, Soil & Water Conservation, IPR, Imkong L. Imchen aser Deputy Commissioner, Mokokchung, Thsuvisie Phoji nungeria o tatsütsü jembitsü.

Iba sentong nung Tsungremmong chiyongba mapang alitsü, ta sangdong ka ajanga ashi.

Mokokchung Police-i miim mozü ayoker 8 apu



Mokokchung, Chiteni/July 26(TYO): Mokokchung

Police-i July 21 aser July 24 nü Brown Sugar (Sunflower) bona lia nisung 8 puogo aser parnokji Dilong ward nung alir arishi kum 39 tain Islam Khan-(Bendangmongba), Penli ward nung alir arishi kum 49 tain Longyachang, Tongdentsuyong Ward nung alir arishi kum 36 tain Tongpok Imsong, Alichen nung alir arishi kum 40 tain Sentimongba, Artang ward nung alir kum 32 tain Sungjemkaba, Akhoya nung Tiakumzuk, Akhoya nung arishi kum 25

tain Jangdangonen aser Akhoya nung arishi kum 53 tain Imlitoshi.

Police-i parnok ket nungi Brown Sugar (Sunflower) gram 32.56 ngutet aser iba maparen dak sentakba nung Mokokchung Police-i case Mokokchung PS-1 C/No.0016/2023 U/S 27NDPS Act aser Mokokchung PS-1 C/No.0017/23 U/S 21(b)27NDPS R/W 34 IPC nung zülüoka bushitsüngdang agidagita Additional Superintendent of Police Mokokchung ajanga metetdaksü

Incident Response System atema training tenzükogo

Dimapur, Chiteni/July 26 (TYO): Nagaland State Disaster Management Authority (NSDMA), Home Department ajanga National Institute of Disaster Management (NIDM), New Delhi den lungjemer asemnü 'Incident Response System', Basic & Intermediate' indang training ka ATI, Kohima nung July 25, 2023 nü tenzükogo.

Iba training nung tongtipang administrative jenjang bona alirtem aser/mesüra lendong-timtem balala ketdangsuba nung shilem agitsüpurtem dak rangloker.

Iba training nung shisalen sayur ya Shekher Chaturvedi, Assistant Professor, Division of Disaster Response & Recovery, NIDM, Delhi lir.

Alima lendong-tzüdong balala nung agency balalai yariteper aser parnok tsungta teti amalitep peria malitsü aser iba yongji lendong-tzüdong ketdangsuba nung rongsen aser nübu tali indoker.

Sentong yanglur telangzüba agütsüra aser stakeholders tem training agir lira, amalitepba aser osangtsüsang agitepba nung tapok adokba ajemtsü. Iba nükjidong nung Government of India ajanga Incident Command

System (ICS) ya tajungtiba ta jangjatet.

Government of India-i ICS ya agizüka Incident Response System (IRS) nungja agütsü. IRS nükjidong ya jelia ketdangsurtem shimteta maparen balala inyadkatsütsü aser parnok mapa atema training agütsütsü lir.

Incident Response System ya tila süang, tulua süang, lendong-tzüdong balala ketdangsuba system ka lir. Iba system yagi sentong balala ayongzüksü, mapa alemtsü aser staff ayongtentsü nükla agütsür aser yangji dena aliba tentet balala tsungta amalitep aser osangtsüsang agitemba tajungba kumdaktsür.

IRS ajanga lendong-tzüdong tenzükdang ratatepba aliba melena payimi telangzüba agütsür.

Iba training tenzükba sentong nung Abhijit Sinha, IAS, Principal Secretary (Home) aden aser pai sentong tenzükba o jembia liasü, kong Johnny Ruangmei, Joint CEO, NSDMA menden liasü aser Khrolou Koza Lohe, Assistant Manager (Training & Education), NSDMA ajanga melepzung o jembi.

GOVERNMENT OF NAGALAND
DIRECTORATE OF EMPLOYMENT, SKILL DEVELOPMENT & ENTREPRENEURSHIP
NAGALAND: KOHIMA
NOTIFICATION

Dated Kohima the July, 2023

NO.DET-2/14/2001 (PT-II). List of candidates selected for undergoing training at various Govt. ITIs for the academic session 2023-24/25 is hereby declared as enclosed in Annexure. Candidates may check the result from the office of the respective Govt. Industrial Training Institutes/ Local dailies.

N.B.1:

- Admission will commence from 01/08/2023 till 11/08/2023. No further admission will be entertained after the expiry of last date.
- Class/Training will commence from 25/09/2023
- Admission fee = ₹.3,600 /-
- Original Documents to be produced at the time of admission.

N.B.2:

- It is hereby notified that Trades where applicants are less than the minimum required numbers as prescribed under the terms & conditions as per Advertisement Sl.No. 11, are hereby de-affiliated temporarily. In this regard, candidates are given the option to join in their preferred trades where seats are available in any Govt. ITIs.

Sd/-
KOVI MEYASE, NCS
 Additional Secretary & Ex-Officio Director.

Rajnath Singh-i Kargil War nung asürtem nem akhüm agütsü



July 26, 2023 nü Drass, Ladakh nung aliba War Memorial nung Kargil Vijay Diwas amongdang Union Defence Minister, Rajnath Singh-i Kargil War nung asürtem nem akhüm agütsüba noksa nung angur.

New Delhi, Chiteni/July 26 (Agencies): Bodhbarnü Defence Minister, Rajnath Singh-i Drass, Ladakh nung aliba War Memorial semdanga 1999 küm Kargil rara nung taküm bendanga agüja asür sepaitem nem akhüm agütsüo.

Ato kilonser, Narendra Modi-ia 1999 küm Kargil rara nung Pakistan madak takok angutsüsa taküm bendanga agüja asür sepaitem nem akhüm agütsü.

"Kargil Vijay Diwas anogomong ajanga India nunger tasütaitem bilemteter; parnok tasü aibaji linük nüburttem atema teti asoshi

tajungshiba asütsü," ta Ato kilonser Modi-i Hindi oshi agi twitter ajanga metetdaksü.

Kargil Vijay Diwas ya küm shia July 26 anogo nung amonger, aser iba anogomong nung Kargil war mapang Operation Vijay nung shilem agirtem nem tetushi agütsür.

Kargil War mapang nung Indian Armed Forces-i tsünsang-mopung tamajung nung Dras, Kargil aser Batalik Sectors nung tsükchirtem madak takok ngua liasü.

24buba Kargil Vijay Diwas nung Mongolbarnü Lamochen (Dras) nung Indian Army temi sentong ka agia liasü. Iba

sentong nungji Kargil rara nung shilem agirtem, Veer Naris, Veer Matas aser taküm bendanga agüja asür sepaitem kinüngertem aden.

Ano tanga osang ka nung, Kargil Vijay Diwas dak sendakba nung Union Territory of Ladakh nung tang mezüing Kargil nung tetsür police station ka amenokogo; tetsürtem anema ozüing alema inyakba ken otem benoktsü nükjidong nung iba police station amenok.

Bodhbarnü Additional Director General of Police, Ladakh, S D Singh Jamwal-i tetsür police station ji semzüksü, ta ketdangser kati metetdaksü.

Lok Sabha nung Forest (Conservation) Amendment Bill agizük

New Delhi, Chiteni/July 26 (Agencies): Bodhbarnü Lok Sabha senden nung opposition party temi Manipur tensa onük nung longkak taitdak mapang nung sorkari Forest (Conservation) Amendment Bill 2023 agizükogo.

Iba bill ajanga linük arrtsülen kilometer 100 telongtet nung aliba alibo arem atema wazüka ayuba nung mezüingsemsü aser item arem nung zoos, safaris aser eco-tourism facilities amenoktsü atema temelaba agütsütsü.

Forest (Conservation) Amendment Bill-2023 benokba

sülen o lemtepa mapang nung Environment Minister, Bhupender Yadav-i telangzüba agüja liasü.

Opposition MP temi Manipur onük nung maneni longkak aitba ajanga Lok Sabha nung iba bill agizükba sülenbo senden thinena liasü.

Forest (Conservation) Amendment Bill 2023 ajanga sorkari achaayangba railway lenmang mesüra gari lenmang anasa aliba aremtem, arem wazüka ayuba küboki maittsü aser nisung alitsü, railway tasen yanglutsü aser lenmang anasa terenlok mapa balala inyaktsü

atema arem li melatsü.

Ano International arrtsü, Line of Actual Control aser Line of Control nunga kilometer telongtet 100 tashi nung linük security atema terenlok mapa balala inyaktsü atema arem li melatsü.

Iba dak alia security dak sendakba terenlok mapa, defence dak sendakba projects aser sepaitem camp amenoktsü atema ali hectare 10 tashi melatsü.

Iba Bill kübok Maoists telungpurtemi timtem agütsüba tesemtem nung ali hectare 5 tashi nung public utility projects atema arem li melatsü.



New Delhi, July 26, 2023: Union Minister of State for Defence Ajay Bhatt, Defence Secretary Giridhar Aramane, Vice Chief of Navy Staff Vice Admiral Sanjay Jasjit Singh, Vice Chief of Air Staff Air Marshal AP Singh, Vice Chief of Army Staff Lt General MV Suchindra Kumar aser Chief of Integrated Defence Staff to the Chairman & Chief of Integrated Defence Staff to the Chairman, Chiefs of Staff Committee (CISC), Lt Gen JP Mathew nungeri Kargil rara nung asürtem nem akhüm agütsütsü atema National War Memorial-i arudang tangokba noksa nung angur.

2022-23 küm MGNREGA indang Job Card crore 5 agienadokogo

New Delhi, July 26 (Agencies): 2022-23 küm Mahatma Gandhi National Rural Employment Guarantee Act (MGNREGA) kübok Job Cards crore 5 dak tema agienadokogo, ta sorkari Lok Sabha senden nung metetdaksü.

2021-22 küm den medemdangra ibaji shilem 247 agi teimba agienba/indokba lir.

July 25 nü Lok Sabha nung telangzüba agütsüdang Rural Development Minister, Giriraj Singh-i, 2021-22 küm MGNREGA kübok mapa inyaker 1,49,51,247 indang job cards agienadok aser 2022-23 küm job cards 5,18,91,168 agienadokogo, ta metetdaksü.

Job card aika agienadokba kuli metetdaksüdang Singh-i, taila job cards, duplicate job cards, nisungtemi joko mapa meinyaknüba, Gram Panchayat nungi nisungtem teti atema aienshiba mesüra nisung asüba kulitem ajanga job card agienadok, ta metetdaksü.

Congress MP ana- Gaurav Gogoi aser V.K. Sreekandan nati Rural Development Ministry dang 2021-22 küm den medemdangra 2022-23 küm job cards agienbaji shilem 244.3 agi teimba asü?, ta asüngdangba langzüdang Minister-i item telangzüba agütsü.

Osang angazükba agi, Centre sorkari Aadhaar card

den MGNREGA job cards sendakteptsü atema tuyuba aser Aadhaar-Based Payments System (ABPS) ajanga aayangertem nem taa agütsüba kuli ajanga-a job cards aika agienadok.

Taküm küm kija nunga June 23 anogo tashi nung mapa inyakertem lakh 61 indang job cards agienadokogo.

Mahatma Gandhi National Rural Employment Guarantee Scheme ajanga yimtsüngtem nung alirtem nem anogo 100 aayangtsü atema maongka agütsür.

Job cards teimtiba agienba state temji West Bengal, Andhra Pradesh aser Telangana state tem liasü. 2021-22 küm West Bengal nung job cards 1,57,309 agien aser 2022-23 küm job cards 83,36,115 agienogo, aser ibaji shilem 5,000 agi teimba agienba liasü.

Andhra Pradesh nunga 2021-22 küm job card 6,25,514 agien aser 2022-23 küm nungbo job card 78,05,569 agien aser ibaji shilem 1,147 agi teimba liasü.

Yamaji Telangana nunga 2021-22 küm job card 61,278 agienadok aser 2022-23 küm nungbo job card 17,32,936 agienadok, aser ibaji shilem 2,727 agi teimba agienba liasü.

2022-23 küm MGNREGA scheme kübok mapa inyakertem shilem 57.43 bo tetsürtem lir.



New Delhi, July 26, 2023: Tawa West Bengal nung Panchayat election agiba mapang rara adokba dak sendakba nung Bodhbarnü New Delhi nung BJP lenirtem- Ravi Shankar Prasad, Satya Pal Singh aser Rekha Verma nungeri osangbenertem den jembidang tangokba noksa nung angur.

PM Modi-i Delhi nung IECC Complex semzüksüo

New Delhi, July 26 (Agencies): Bodhbarnü Ato kilonser, Narendra Modi-i Delhi kübok Pragati Maidan nung International Exhibition-cum-Convention Centre (IECC) complex semzüksüo aser nungja tasenba 'Bharat Mandapam' agütsü.

Taküm September ita nung iba complex nung G20 senden amentsü.

Iba sentong nung jembidang Ato kilonser Modi-i, "Asen linük nüchiso anguba sülen küm 75 ajungba atema asenok benjungtepba mapang ka nung 'Bharat Mandapam' ya asen linük atema tepor tajung sempet ka lir," ta metetdaksü.

Iba complex semzükba sentong nungsa pai sangro ka zünga metetdaksü, drone ka yimdaksü aser iba nungtem nung adokba commemorative

stamps sayatsü.

Modi-isa, kobi melii alima nung museum tulutibaji Delhi nung yanglutsü aser iba museum dangji 'Yuge Yugeen Bharat' ajatsü, ta metetdaksü.

IECC semzükba sentong nungji tejaoker 3,000 shi aden aser sentong nung adenertem rongnung Cabinet minister tem, industry ketdangsertem, film actor tem aser nungtugu nisung aika aden.

IECC complex ya national project ka ama yanglu aser iba kiojen yangluba nung sen crore 2,700 shi indokogo. Iba complex campus area ji acre 123 shi lir.

Iba complex ya India nung MICE (Meetings, Incentives, Conferences, and Exhibitions) tulutiba lir. Iba complex nungsa convention centres, exhibition halls aser amphitheatres lir.



TIR YIMYIM YIMOBILEM (EDITORIAL)

DIMAPUR YANGTEPNÜ, CHITENI (JULY) 27, 2023

Tawatakdak maka auyar asü ?

Tang Nagaland nung police meyong injang prangpong ayudak 'police central store' nungi injang meyirijang ana asem agizüka ayokba mapaji joko asenok Nagaland nung alir Naga nungertemi auyatsü tashibo auyamadoker tawatakdak maka auyar südi ta bilemer. Ashiko, asenok Naga nung asoshibo iba ama mapaji jangratemtsüka asütsüa akok, kechiyong police central store nungi injang auyasangji tangar masü saka tongti tanüksang, In-charge-ba liasü. Aji oda, tamalen aiben iba yimobilem nung lemsatepba ama, Nagaland nungbo tanüker ayubaji azü nem shi nüka yutsü amai dang ataloker. Ashiko, bendangertemibo Nagaland nung alir Naga nung jak Khristan ta angashi dang, Nagaland-ji kotak lima amai bilema alitsü akok, ajisüaka tonga arua reprangdangra akhidang Yerimia ainkeri ashi ama, asen ki aser asen limaji auertem kisung adenshia alidak tesepong ka mesük. Asenok jak auyatsü nung mongin kümadoker asünungji, joko yimten senpong aser jangpong nungi dang masü saka mungdang aser arogo senpong nungi dena auyatsüa marendaki akümba purtemji asenok lir. Atangji, ayatzüra aser timtem marem auyatsübaji nisunger yimya dak keta lir. Iba jagiang David chubaia Tsüngrem dang " ni sensaka teyutsü, aji mesüra ni auyatsüa akok aser nü tenung menüktsütsü," ta sarasademba asenoki Laishiba nung azünger. Ajisüaka, kanga majung aser mazümalem kaji, asenoki ayuba yabo ayatzüra aser makamait agi auyar masü saka kari talila kanüba agi morumorua tangar meyong auyar aser kari mapa meinyaknü azümasenba agi auyar. Ashi, Tsüngremibo asenok nem anogo shia chiyongtsübo peria agütsür. Aji oda, asenok jak auer aküm nungji, ayuba mapa ya tai masü amai asenok lokti, yimten aser arogo tashi nung kümogo. Ibayongji, joko asenoki mauyartemang takoksa amato bilemer aser lia lia asenok rongnung meranga inyaker takar akümstsü tokteper masü saka kecha meinyak ser takar akümstsü toktepertemji asenok kümogo. Aji oda, kecha meinyak ser pei ayangba taa aser ita sen dak malang takar akümstsü tokteperba limaji Nagaland lir. Atangji, kecha meinyak ser takar akümbaji nisung nükdangbo jangratemtsüka, anungji kibong nunga kinungtsüi kinungbo dang tangar amaji mapa meinyak ser takar akümstsü ajungshir aser kinungboia kinungtsü den mapa meinyaki takar akümstsüba indang shisalemsatep manener. Tanü asenok kibong jak nung kanga temulung agüja jembiba onükji " mapa meinyaki takar melamelaa akümba" indang asütsü. Iba jagiang tenlaa tulu agütsütetsü ta asenoki angatet. Tanü kechi mapa nung südirsüaka asenok nem anepalutsü aser ketdangsütsü atema nübertem meyong rongsen lemsüktsüba mapa nungji, atangji, temoatsü lir, ajisüaka itemji auyaa takar akümstsü merangra temoatsü agi atakatema akümstsü. Asenok aikati chirnurtem asoshi rongsen jenti auyadena yutsür aser iba manungji parnok ayongayonga lia aotsü amai bilemer. Ajisüaka, itemji asenoki ngua roseptsü aser ozü ama yimshia aotsü ta Laishibaibo ashir. Atangji, asenoki meranga meinyak ser chirnurtem tsüngdang rongsen bendena sayu nung, kodaser parnoki meranga inyaksü ? Aser meranga meinyakra komaser asenoki bendena yutsüba rongsenji züintsü ? Aji bilemdangdi aser asenok senmangji mapa meinyak ser bendenba rongsentem ya masü saka mapa meranga inyakba sobaliba südaktsüdi. Kechi kodaser linük kümzüksü atema nübertem meyong senotsü agi alia ayuba prangpong aser injang tashi yoka asenok takar akümstsü merangtsü ? Kechi kodaser asenok nem nübertem meyong senpong aser jangpong anüktsü lemsüktsü nung, asenokiang itemji auyatsü ? Kechi mapa nung südirsüaka kiburi kinüker dak temulung alemtsüsa aser kinükertemia kibur akümstsübuttsüa alitsü tim. Kecha meinyak ser anguba rongsen nung nümadangtsü kecha mali. Auyaba sen agi alia shi den chiyongyonga, shi den chiyongogo ta pi dang nümadanga ashitsübaji tasak. Kasaji, asen chirnurtemi asen dang oba, oja asen ya koba mapa nungi anguba sen agi yamai akar aser onok mesür (?) ta asüngdang dang, ayuba sen agi parnok mesür ser nung 'Tsüngremi moatsür' ta shira, asenoki asen chirnurtem dang tsüngrem tai ka külemtsü teyur asütsü.

OLEMSABANG

TEMULUNGER SEPAL

- P. Renthly Jamir

(Yashi adok nungi...)

Menoknok nungi kümzüksü government i training tapu tapu agütsür ki ojen jak tip tema ayur ta inyaktep. Onok town nung tamanger tajung ka iba menoknok anokdang mener enzütsü atema kenü par kima compound nung sozulangben ka yanglua alidang yimera nisung tain Pentecost amanger ka aru. Iba yanglubaji ngur "oko nai ya tashi amangtet" ta ashiba bilemteter.

Revival milak jangru tialong nung ano tetsübuttsü menoknok anakja ta nübur taoksatsü aiben ajurua aru. Kasa Yisu asoshi temulunger Sepai saka Baptist nung tamanger sangjagi science dak Tamang aka aser Pentecost nung tamanger sangjagi temerem tzüyim sadangtsüba anü malu sota ayuba tzüyim tzüsem yipru anendaktsüba nung tamang ayu.

India lima Nagalima nung temulunger Sepaitemji tokja lir, tang Ao lima nunga Reverend angur tenzüksüba wadang nung aikasa lir. Temsüa alir mapang tatong nung pei arogoi meshitsüba ano pa agi alang mungdangi agütsüba nüburtemi parnok akhümstsüba meraketa repringer. Ano karbo peisasa canvassing oa sentsüh tsüa bushibatema lir. Kodang reverend ta südir nüburtemi Tangar den khenyongi balaka ta bilema benshir. Anungji parnok-ia yamaji libalirutsüla ta bilemer.

Reverend aika tangar dang tama mit aita ain adokba otsü jembir. Ano Reverendtemi züluba kakat pa anema par kinunger anema tamajung inyakba jak sükasüka zülur tatem nung saka ni, ozüi tai tokogo ta züluba angur. Tai atokbaji jengang tulu ta ashir. Anungji tai tatok tama (forgive and forget) ta süang ta ashir. Alima nung ken mejemerji sempet tajungtiba rongnung ka lir. Aor lanur ken mejemer tajung aika lir ta parnok ken ajanga lanur aika temulung meyipa arur ta bilema alinung taküm 2023 ken mejemer aikati sen aah ken mejemba constituency ka nung candidate anaprongla asemprongla na shimtetogo ta mejemtsüba angashidang ken mejemertem ya-a business atema dang ta bilema arur. Aser parnok ken jangratema mangar.

Tatem nung Naganunger Yisu yimsü agizüker küm 150 süia aodang alimai seret odangtetba oren agi iba ocet tembangnür. Yisu asoshi Temulunger Sepaitemji pei lemsükba duty shitak tsüngchirsa meinyakteter asü ta bilemer. North East nung Khristan State tem nübur tia asadanga tendangtsü India nungi RSS telok Hindu yimsü nung takotet nisung kar aruba parnoki bushitetba yamai shir ao. Aser aji shitak atalok ta ashir. Mizoram state aser Meghalaya State ana nung Khristantemji Presbyterian aser Catholic tamangertem lir. Anungji state anaji BJP teloki melamelabo makoktsü. Saka Nagaland aser Arunachal State anaji Baptist tamanger asünung anajibo BJP teloki melamela akoktsü ta asadangtet. Tang state ana nung BJP ticket rakteper teas taküm election Nagaland nung Congress party nungi Candidate 23 aiba kata madok, Impur nunga BJP den lokteper aisang adok. India nung Secular partyji Congress party dang lir. Tamalena State Assembly nung Theology azünger MLA tem party ka toktsür ka nung oa atenba otsü jembir.

Khristan State nung Hindu nung arungba mitsü bener arubajia asenoksa lir. Yisuji yashi aser tanu kasa ta bangpet jembir, Peter tsüngdenchiokdak alidang arogopur ishikati sarasadem kotak tenyar alua chiok. Paul nungeri tsüngdenchiokdak nungi sarasadem. Menoknok anoka talenba yinzü salaja kishitem lapok. Süra Nagalima tamangertemjibo yutsür Aor arogotem tenlaki 194 nungi ayimtenbabo kechiba aiben Tsüngrem-i melangzür ta bilemer. Asenok Yisu asoshi Temulunger Sepaitem Hindu nung (BJP) kümja kümer nung asen nüburtemi Uniform Civil Code ama ozüng anema tapu tapu ayimtenyonga ya aseni onketba lung agi asenok dak alua aoner ta nübur jakai telung tonga lua shisadangtsü mapang tongogo ta bilemba shisa lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Georgia nung aliba Arogoka nung Mexico nung 30-i Khrista agizük



Southwest Georgia nung aliba First Baptist Church nung Khrista agizüker Mexico nung aayangertem tangokba noksa nung angur.

July 26, 2023: Tawa Georgia nung aayangtsü atema arur Mexico nung 30-i Georgia nung aliba First Baptist Church Rochelle nung Khrista agizük.

Iba Arogo nungji pastor-i tekülem sentong nung adentsü atema Mexico nung aayanger 60 jaoka liasü.

Arogo kati bendangertem tekülem sentong nung adentsü atema jaokba ajanga alima nung Tsüngremer yimli yangertetsü akok, ta pastor-i ashi.

First Baptist Church Rochelle nung Pastor, Richard Compton-i, Tsüngremi pa melung nung jembiba ajanga July 13 nü chiyungtsü aser Tsüngrem O angatsü atema pai Mexico nung aayangertem jaoka liasü, ta metetdaksü.

Southwest Georgia nung aayanga watermelon aongtsü atema arur Mexico nung 30-i Yisu Khrista nem taküm bendanga agütsüogo, ta pastor Compton-i ashi.

Arrshi küm 57 pastor, Compton'er Arogo nung Amongnü shia tamanger 115 shi tekülem sentong nung adentsü atema arur, aser par Arogoi tanga Arogotem danga Tenla ki malirtem tekülem sentong nung adentsü atema jaoktsü ayongzüker.

"Ozü Arogo nung deacon tem rongnung ka, Don Wood-i watermelon lu ayimer aser küm shia June ita tatembanglen nungi watermelen aonger. Pai küm shia linük balala nungi aayangertem jaoker, aser takumbo pai Mexico nungi aayangertem jaok," ta Compton-i ashi.

"Küm shia pai jaokba aayangertem meyipa aotsü mapang nung pai parnok ajak jaoka chiyungdaksür. Takumbo Tsüngremi kü den jembiba ajanga ni parnok ozü Arogo nung chiyungdaksütsü atema jaoka liasü," ta pastor-i ashi.

Iba sentong nungji Arogo den tesendaktep alir kati Spanish oshi nung Tsüngrem O

jembia liasü.

Mathi 28:19-20 nung Yisui tamangertem dang osangtajung proktsü tuyuba nung ajemdaker Compton-i tarutsü nunga evangelistic sentong aika ayongzüka agitsü tebilemba lir.

"Onoki langkabo inyaktetsü, ta Tsüngremi kü melung nung jembia liasü. Iba ya sentong ka dang liasü saka sangkümba onoki sentong aika ayongzüka agitsü. Mei mapang nung aayangi arurtem den Khrista osangtajung lemsatepba ajanga parnoki tekümtet maangka angubaji jangratemtsüka aser tesüngmangtsüka liasü. Tsüngremi dang ibaji inyaktetsü," ta Compton-i ashi.

Nisung aikati parnok mejaokba agi Tenla kidangi maouer, ajisüaka parnok jaokra parnoki Tenla kidangi arutsü, ta study balala ajanga bushitetogo.

Thom Rainer-i züluba kaket 'The Unchurched Next Door' nung yamai shia lir- Tenla ki malirtem shilem 82-ibo parnok tekülem sentong nung adentsü atema jaokra Tenla kidangi arutsü, ajisüaka Arogo züngsemtem shilem 2-i dang Tenla ki malirtem dang par Arogo Tenla kidangi arutsü atema ajungshir/jaoker.

2016 küm Lifeway Research study ka ajanga ashiba agi, Tenla ki malirtem shilem asemsü nungi shilem anatibo parnok Tenla kidangi arutsü jaokra arutsü.

Pastor Compton-i, "Item studies ajanga ni mesüngmanger, kechiyong asenoki asen medemertem aser kiyongertem mesüra külem mapa inyakertem Tenla kidangi arutsü atema mejaoker. Amongnü anogotem shia pastor temi züngsemtem dang medemertem, kiyongertem aser külem mapa inyakertem Tenla kidangi jaoktsü atema ajungshitsüla; Amongnü anogo ajak nung ibaji ajungshitsüla,"

ta ashi.

Pastor Compton-i, "Asenok ajak pepei lenmang nung kanga mazüngi alir, mapa dak sendakba, ki dak sendakba aser kibong dak sendakba maparen balala nung mazüngi alir, ajisüaka asen tamang jenjang tashi itshitsüla, Tsüngrem den tesendaktep yanglutsüla aser Arogo den sendaktepba dang masü saka ministry nunga shilem agitsüla," ta ashi.

Compton-i, Khristantemi, talisa pastor temi pei tesem nung nisungtem den mesendaktepra Arogo maliba züngsemtemji yamaji dang alitsü, anungji asenoki Arogo malirtem ayimjema inyakttsüla, ta ayongzüker.

ANOGO ABEN TSÜNGREM DEN

Nai Kechi Angur Aji Na Kümang

T.Ken 119:33-40

Nai kechi angur iba jagi na kechi akümtsü aji bentettsür. Nai kechi angur iba jagi na kechi asütsü iba nung yarir. Anungji nai kechi repranger kümdanga reprangtsüla. Ken züluri sarasademba nung kecha tesüngmangtsü mali. "Amajok reprangba nungi kü tenüktem meyipa odakjang, aser ne lemangtem nung ni saksalema kümdakjang" (t.37). amajok tetezü jenjang maka. Anogo shia asenoki TV nung kechi angur timba jenjang makabatem lir. Ibaji Tsüngrem nungi aruba masü saka satan aser alima nungi aruba lir. Aser ibaji amongtema malir, ajak amajok. Amajok tetezü tazüngla- puja nung kecha malir.

Tsüngrem O nung reprangang, ibai ochi lir. Ibai Tsüngremer rongsen. Ibai amungtema alitsü. "O Kibuba, teti tatem maka, ne O kotak nung akanga noktaka lir" (t.89). Kodang Tsüngrem O agi asenok sünga lidir asenoki amajok den rarar. Kodang asenoki Laishiba tapu dangi asenok tenük meyipdir, asenok ochi aser jenjang akaba nung ainer aser teti tatem maka taküm den sendaktepa alir. Asenoki TV nung noksa tapu balala repranger aser iba jagi taküm nung timtem madokdaksür ta ashir saka tenük agi kechi angur aji tekoloki aier aser iba jagi temulungjang nung mapa inyaker, aser na jenjang makaba taküm kümdaksür. Laishibai asenok dang ashir, "Shibai Tsüngremi mulungba inyaker pa teti tatem makai alitsü" (1Yn. 2:17).

Alima kechi agütsür aji atamata, tiyazü aser jenjang makaba lir. Alima kimong nung ne taküm kimong teyanglu. Iba melen teti taküm makai alitsü Tsüngremer O nung ne taküm kimong yangerang.

Uttar Pradesh nung Hindutva teloki Khristan kibong ka amak

July 26, 2023: Tawa Uttar Pradesh state kübok Rae Barely district nung nung Hindutva telok kati pastor ka aser par kibong amak, ta International Christian Concern (ICC)-i metetdaksü.

Pastor jagi yimdaklirtem Khristan yimsü dangi meyipdaksür, ta tai tonglokja lokti jagi par kibong amak. Pastor kinüngtsü tekolak yirua hospital-i anir ao aser tangartema telung nung zübo

keta yirua hospital-i anir ao.

Osang angazükba agi, Amongnü pastor aser par kibong Tenla kidang lia Hindutva telok nung züngsem 30 shi kotari aser aou süng bener aru. Parnoki pastor dak azükba mapang kinüngtsü ibaji nokdangtsü merangdang la tekolak kanga mejungi yiru. Iba mapang nungji Arogo züngsemtembo jena oadok.

Hindu nung lokti jagi house church ji benoktsü aser menden

den tanga oset aika raksatsü.

Pastor-i phone ajanga police dang teyari meshi, ajisüaka police tonga aruba sülen pastor ang police station-i anir ao.

Lokti jagi pastor-i anti conversion ozüng alema yimdaklirtem Khristan yimsü dangi meyipdaksür, ta police dang ashiba sülen police-i ken o ka benok aser pastor den pa kinüngtsü na ghonda 24 shi pua ayuba sülen tesüsa bail nung chiok.

Chhattisgarh nung Khristan tenet dak azük

July 26, 2023: Chhattisgarh state nung tetsür asem densema Khristan tenet dak kanga mejungi azük; Baster district kübok Bhaganpal yimdak Hindu yimsü alia amangertemi Khristan tenet dak azükba sülen parnok Jagdalpur nung aliba sorkar hospital kati anir ao, ta International Christian Concern (ICC)-i metetdaksü.

ICC den jembidang pastor-i, "Taküm March ita nungi tenzüka Bhaganpal yimdak Khristantem kanga amokmerener," ta metetdaksü.

Pastor-isa, "Tesüiba ita ana tsüngda yimdak Khristantem anaben tashi jaoka liasü, aser parnok dang akhi yimsü dangi tanaben meyipang ta ashi. Yangi Khristantem alitsü kanga tasak kümogo," ta ashi.

Amongnü tekülem sentong nung adentsü atema Khristan 60 shi adenshia aliba mapang nung Hindu yimsü alia amanger nisung 15 shi Tenla ki telungi aiba sülen Khristantem dak azük.

Iba tatalokba nungji Khristan tenet kanga mejungi yirua liasü. "Khristantemji tetsübu nung tanga yim kati oa Khristan ka

mejong kidang jenoka lir aser parnok Bhaganpal yimdaki meyipa ora lendong ajurutsü. Iba ama tensa ka nung police mesüra administration-i parnok meyaritsü," ta pastor-i metetdaksü.

Khristantem dak azükertem anema police-i ken o ka benokogo, ajisüaka tang tashi aibelener shinga mapu.

Tesüiba ita ka tsüngda Chhattisgarh nung Khristantem anema inyakba tatalokba trok lir, ta International Christian Concern-isa metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Rishikangshi

(n) kanga timtemdaktsuba (persecution)

* India nung Khristan purtem kanga **reshikangshir**.

Ritsüng

(n) tongpang nung noktaktertem , nokinketertem (group of warriors)

* **Ritsüngertemi** yim kümzüka ayur.

OLONG PAITEP # 6588

1			2		3		4		5
6		7							
					8				
9				10					
						11			
			12						13
	14								15
					16				
			17						
								18	
19									

TIPLÉN

- 2. Teburtemi tejak nung awaba - (8)
- 6. T _ _ _ em - (3)
- 8. Tzüc ayudak - (3)
- 9. Nüngdakba dang timba - (6)
- 11. Züina ao - (4)
- 12. Yangi tzü angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzü tarok - (3)
- 19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
- 3. Nisung ka mapa inyaksü nübo - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsüngda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

OLONG PAITEP # 6587 TELANGZÜBA

TIPLÉN :

- 1. Telok, 4. Aluru, 6. Ozüng,
- 8. Emk, 9. Kin, 10. Teti,
- 12. Süir, 13. Jen, 14. Ola,
- 16. Talak, 17. Mazük.

LANGTSÜNGLEN :

- 1. Tenükjang, 2. Luden,
- 3. Kiochtsü,
- 5. Lenti, 7. Tajangzük,
- 11. Teronem, 12. Sempa,
- 13. Jahaz.



**TAMBUR ONSARA TOKOROSÜ KA TASÜ
YIPTEN NUNG :**

Tambur: Tantsü, na ni anasa lir südi?
Tantsü : Hau tambu ni yangi dang lirko.
Tambu : Jala talakla aser tedi nunger ajak ni anasa dang lir südi?
Tantsü : Ajak lirko.
Tambu : Ni semdangi arur kidangser toa iba takdang nungsa lir südito?
Tantsü : Hau ajak lirko tambu, na kechi shinerar menungnangi dang shiangma.
Tambu : Aet iba takdang nungsa ajak lira kaaba tanga takdang nungji kechiba fan tsükloka ayur aji?

~ Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.



- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :



CULTURAL PRIDE INSPIRED BY HERITAGE
Mera Gaaon Meri Dharohar Portal

Digital medium ka asoshi India nung aliba yimtsüngtem tetsü tebou mapang nungi bentshia aruba sobaliba aser inyakyim indang otsü tejakdangi bener arutsü asoshi inyakyim ka.

Portal ka ajanga yimtsüng lakh 6 dak tema sendakteptsüba

Yimtsüngtem indang memetei aliba puti otsü aser takar sobaliba wazüka ayutsü atema tongtambang jenjang ka

Yimtsüng lakh 3 dak tema iba portal nung denogo

mgmd.gov.in portal

nung densema ajak den India nung yimtsüngtem indang tetsü tebou mapang nungi bentshia aruba sobaliba aser inyakyim tem indang otsü lemsatepang



“Na koba jenjang ka tonger lidri liaka, na yimti tulutem mesüra alima nung koba tesem nung amenok ledir liaka, yimtsüng nung lidanger lira asen yimtsüngi asenok kodanga metoktsütsü. Parnok asenok dak tangloka lir aser asen tebilemdangba nung teti alir. Ibayongji asenoki India indang tanüla yimtsüngtem nung lir ta ashir kechiyong yimtsüng tanüla asenok dak alir”

Narendra Modi
Prime Minister



Launch of mgmd.gov.in portal by
Shri Amit Shah, Home Minister & Minister of Cooperation

27 July 2023 | 5:30 pm

Qutub Minar, New Delhi

**GOVERNMENT OF NAGALAND
DIRECTORATE OF EMPLOYMENT, SKILL DEVELOPMENT & ENTREPRENEURSHIP
NAGALAND: KOHIMA**

NO.DET-2/14/2001/PT-II/

Dated Kohima, the July, 2023

RE-ADVERTISEMENT

Reference to Advertisement letter of even number dated 03/07/2023 limited seats are still available in the following trades under the following Govt. ITIs. Eligible candidates may contact Principal/Vice-Principal of the concerned Govt. ITI for selection/ admission along with relevant documents (first come first basis) from 01/08/2023 to 17/08/2023.

*All other conditions remain the same as advertised earlier.

SESSION: 2023-24/25

Sl.No	TRADES	DURATION OF COURSE	MINIMUM EDUCATIONAL QUALIFICATION	NAME OF GOVT ITIs	
A. Engineering Trades					
				*NCVT	*SCVT
1.	Wood Work Technician (Carpenter)	1 year	8 th Passed	Wokha, Phek	
2.	Plumber	1 year	8 th Passed	-	Phek, Zunheboto.
3.	Mason (Building Constructor)	1 year	8 th Passed	-	Kohima.
4.	Welder	1 year	8 th Passed	Kohima	
5.	Mechanic Diesel	1 year	10 th Passed with Maths & Science	Kohima.	Tuensang
6.	Electrician	2 years	10 th Passed with Maths & Science		Mon
B. Non- Engineering Trades.					
				*NCVT	*SCVT
1.	Computer Operator & Programming Assistant(COPA)	1 year	10 th Passed	Zunheboto, Mon,	Wokha.
2.	Knitting	1 year	8 th Passed	-	Kohima
3.	Sewing Technology	1 year	8 th Passed	Dimapur.	Kiphire, Phek, Wokha, Zunheboto
4.	Stenographer Secretarial Assistant	1 year	10 th Passed		Dimapur

Sd/-
KOVI MEYASE, NCS
Additional Secretary, & Ex-Officio Director (HoD)

Mediterranean morok mi nung nisung 40 dak tema süogo

Athens, Chiteni/July 26 (Agencies): Mediterranean morok mi agi yimtsung aser holiday resorts tem nung kongshitsüsa kumogo aser Algeria, Italy aser Greece nung nisung 40 dak tema süogo aser meyririjang aika pei talidak nungi ainshidaktsüogo.

Rhodes asetkong ajunga state of emergency nung lir, aser morok mi ya Corfu aser Evia nunga adoka lir.

Tang mapang talangka heatwave aliba ajema akumtsü mesayur aser Greece nung shilem kar nungbo temperature ya 44C (111F) dang temaba akumtsü imlar.

Sicily aser Puglia nung morok mi ajanga nisung meyririjang aika jena ogo.

Mopung sashia aonba aser süngdong-lidong akongba mechi tesem aika nung firefighter temi mi remsepa morok aittsü tasak akumer.

Tang tashinung nisung timba asüba ya Algeria nung lir, kong anüdoklen Bejaia province tzükumlen nüburttem anizüker aoba mapang mi agi muketbanger sepai 10 densema nisung 34 asü. Bejaia ya

tamajungtiba kongshiba tesem lir, kong nisung 23 süogo, ta yangji alirtem osang ajanga ashir.

Algeria ketdangsür temi ashiba agi, Deobarnü nungi tenzüka morok mi shilem 80 remsepogo aser ano maneni sepai 8,000 shi, fire engine noklang aika aser tayimtsü kar amshia mi remseptsü meranger.

Mi yagi anasa aliba Tunisia nunga kongshia lir, kong tzükum anasa aliba Melloula yimtsung nungi nisung 300 anizüker ao.

Greece nung Civil Protection Ministry ajanga linük nung region 13 aliba nungi region trok nung Bodhbarnü morok mi indang lendong tesashi lir ta tekumdanngtsü sangdonga liasü.

Nisung meimchir libaliru ajanga tzü-mopung melenshidaktsüba mali asübo tan ita Southern Europe, North America aser China nung heatwave ya melila, ta climate scientists temi tentetba World Weather Attribution group ajanga ashir.

Athenes north tsütsü Evia asetkong nung tayimtsü anir ana asü, kong parnok indang Canadair firefighting plane ya

longren ka nung tsükok. Ano iba asetkong nungsa tesem ka nung nisung ka temang rongsar aliba nguteta liasü.

Rhodes asetkong south tsütsü nungi tawa nisung 20,000 dak tema pei kidang aser resorts tem nungi anizüker ogo. Hombar aser Deobar tsüngta emergency flights 40 dak tema nung nisung 5,000 dak tema anir ogo, ta airport ketdangsür kati ashir.

Greece nung mapa pongu nungi ka tourism nung lir aser iba industry ya Rhodes aser danga asetkong aika asoshi kanga tongtipang lir. UK Foreign Office ajanga tang tashi senzüsemponger tem dang Greece nung morok mi agi kongshia aliba tesemtemi maotsü mashi saka tour operator tem den asüngdangya asütsü ashir.

Evia aser Corfu nungia nisung meyririjang aika anizüker ogo aser ano anisüngzükdak tongtipang tesem, Crete nunga ketdangsürtem saksalema lir.

Italy nungbo tzüngsang-mopung ya khenyongi balala lir, kechiaser linük north tsütsü yipru tesashi arur aser Sicily aser ano south tsütsü region kar nung morok mi lir.

Cambodia PM Hun Sen-i mapa toktsütsü

Phnom Penh, Chiteni/July 26 (Agencies): Cambodia Ato Kilonser Hun Sen, shiba alima nung lenir tejentiba ka lir, pai Bodhbarnü ashiba agi pa mapa nungi anentsü aser par jabaso tambusang nem mapa belenzüktsütsü. Küm 40 shi yimsü asüba sülen tang pai mapa toktsütsü telemtetba agiogo.

Taoba mapang Khmer Rouge züngsem, Sen-i 1985 küm nungi linük nung yimsüsüa aruogo aser iba mapang pai opposition party tem ajak nokdanga pa anemertem ajak samatsü aser iba den pa anema nokdakertem linük toktsür jena ao aser nüburttem pei tebilemba lemsateptsü asoshia tetsükdaktsü adoka liasü.

Pai aniba Cambodian People's Party (CPP)-i Deobarnü election kokogo. Opposition tajang ka maliba mapang ka nung parnok vote silem 82 angu aser iba ajanga par jabaso tambusang nem linük yimsü asütsü atema lenmang lapoktsüogo.

"Ni Ato Kilonser mapa toktsütsü atema telemtetba agiba ya nüburttemi angatettsü ta amanger," ta arishi küm 70 tain lenir yagi ashir.

Election ketdangsürtemi election matong tsüngda opposition party tajangba Candlelight Party technical tsütsü aija disqualify sütsü aser CPP-i lower house nung menden ponguprongla akoktsü imlar.

Sorkari voter shilem 84.6-i vote agütsüba ajanga linük nung democracy inyakyim tajungba kuma aoba sayur ta shiogo, ajisüaka United States aser European Union densema

anüolen aliba linüktemi election ya ochi nung aser sadem sadema agiba masü ta shia sorkar aitsüogo.

Hun Sen-i ashiba agi, arishi küm 45 tain Hun Manet shiba four-star general ka lir, pai August 22 nü Ato Kilonser mapa agizüktsü.

"Ni nüburttem dang Hun Manet pusemstü mepeshir, shiba Ato Kilonser tasenba akümstü," ta paisa ashir.

Hun Sen-i joko küm ka ser tesadang shi par jabaso nem pa mapa belenzüka toktsüsüba indang jembia aruogo aser par jabaso yagi Deobarnü election atema nüboyimba sentong nung tongtibang shilem agiogo.

Ajisüaka Ato Kilonser-i, pai mapa toktsüaka maneni shilem agitsü sentong aliba metetdaktsüogo, kechiyong pai mapa toktsüba sülen linük inyakyim nung temelenshi adoktsü akok ta bilemer.

Bodhbarnü sangdong ajanga pai ashiba agi, pa senate indang tir akümstü aser chuba bendangleni orr aliba mapang state tekolak ama inyaksangshitsü.

Hun Sen lenisüba nung Cambodia aser Beijing na tesendaktep kanga junga kümogo aser China nungeri sen aika intokba aser naval base yanglushiba densema danga infrastructure project tem aika benoka inyakba ajanga Cambodia kanga ajanzükogo.

Deobarnü election agiba ya China-i kanga junga agizükogo aser Tir Xi Jinping-ia Hun Sen nem tenüngsang agütsüogo.

dena bener arutsüogo, kong bendanger staff temi casino aser online scam mapa balala benoka inyaksangshiba densema lir.

Critics temi ashiba agi, pa yimsüsüba mapang tzü mopung kanga mejungi raksatsüogo aser ochi mashi inyakyim aika adokogo.

Transparency International's corruption perception index nung Cambodia ya linük 180 nungi 150 buba nung lir. Asia nung parnok kübok Myanmar aser North Korea na dang lir.

Kasa mapang nung Hun Sen-i pa anemertem samatsütsü asoshi temzüng oziung amshiba Rights groups temi aitsüogo, kong critical activists, union lenirtem aser yimden yimsüsürtem densema lir.

Pa yimsüsüba mapang opposition yimden yimsüsürtem aika tepuokdaka yokogo aser Deobarnü election magi tsüngda voter temi ballots magi kümdaktsüra ibaji oziung alema inyaksangshiba ka kümdakja oziung melenshia liasü.

Election agitsüba anogo pongu lia opposition lenir Sam Rainsy shiba linük nungi mintoker lir, pa küm 25 tashi election nung metokteptsü asoshi tenokdangba agüja liasü. Pai voter tem dang parnok indang ballot paper tem ya magi kümdaktsütsü atema mepeshiba atema iba tenokdangba agütsü.

Maneni Opposition lenir Kem Sokha-a March ita linük anema inyaksangshiba atema aitsü aser küm 27 tepuokdak ayutsü atema obendanga agüja liasü. Pa dang house arrest nung lir.

LONGSA MONGKA TSÜKJEMSANGBA SEMCHIR TELONGJEM

Dist. Mokokchung
Khonang Tetushi Agütsür

- 1. Wt. Lipoksangla**, tebu Lt. Imzüuba Jamir, tetsü Lanurenla Lkr sorkar mapa tenzüka nungi temaba jenjang Asst. Superintendent, Directorate of Industries and Commerce, Govt. of Nagaland, jenjang tongtetba.
- 2. Wb. Toshimongba**, tebu Imtitemshi Jamir, tetsü Tainla Ozükum, NSSB Result 2023 nung Junior Accounts Asst. Dept. of Treasuries & Accounts.
- 3. Wb. Moyajungshi**, tebu Chongpongchiten Jamir, tetsü Achila Lkr, NSSB Result 2023 nung LDA cum Computer Asst., Dept. of PHED.

Takok tajung ngutetba asoshi semchir ajaki nenok nem tenüngsang tetushi agütsür. Tsüngremi nenok taküm mapa nung maneni moajang ta sarasademtsür.

Sd/- Noksangtemba Tir **Sd/- Chubameren Tezüür**

OFFICE OF THE
DIMAPUR YIMJENKIMONGTSÜR TELONGJEM
Dimapur: Nagaland, Pin 797112
"Telongjem nung Tejakleni"

TENÜNGSANG AGÜTSÜR

Dimapur Yimjenkimongtsür Telongjem (DYT) ajanga asen senso tajungtemi pie mapa nung nendaka inyakba ajanga temabajenang (promotion) ngutetba takok tajung angurnem tenüngsang tetushi tulu agütsür.

- 1. Mrs. Temsünao Jamir**, Public Prosecutor, Dept of Law & Justice, Govt. of Nagaland.
- 2. Mr. Longchatongba Lemtur**, Sub Treasury Officer, Treasuries & Accounts, Govt. of Nagaland.
- 3. Miss. Temsürenla Lemtur** D/O Mr.Longchatongba Lemtur aser Mrs Kilenjungla Aier tena jalai NSSB 2022 tatitang nung LDA cum Computer Asstt. (District) Dept. of Food & Civil Supplies.

Tarutsü nung nenok taküm aser tenzüka wadang temaba nung ajungketa Tsüngremi moajang ta DYT-i sarasademtsür.

Sd/- I. Anungla Ozükum President DYT **Sd/- L. Akala Tzüdi General Secretary DYT**

Ecuador jail rongrong adokdak asür nisung 31 jungogo

Guayaquil, Chiteni/July 26 ashi.

(Agencies): Ecuador nung tepuokdak tamajungtiba tesem nung azüdokshi adokba nung nisung aika süogo, ta ketdangsür temi ashi aser Tir Guillermo Lasso-i linük nung tepuokdak tesem ajunga nung anogo 60 atema state of emergency sangdonga lir.

Rongnendak Guayaquil yimti nung nisung tali puoka aliba Guayas 1 prison azioktsü asoshi sepai 2,700 shi yokba sülen nisung asür 31 jungogo, ta prosecutor indang office ajanga shia liasü.

Yangji meputepi aliba mapa tamajung inyaker teloktem tsüngta rara adoka nisung 14 yiru, ta ashir.

Sorkari communications secretariat Segcom ajanga ashiba agi, Guayas 1 tangbo aziokteta lir, kong nisung 5,600 dak tema puoka lir.

Linük tesem balala nung aliba tepuokdak prison ketdangsür 120 shi pua aliba chiokogo ta ashir. Tepuokdak tesem kar nung lumia longkak aitba indang ketdangsür nungi osang kecha agüja mali.

Guillermo-i police aser mitkartem dang linük nung tepuokdak tesem azioktsü totuyuba agütsü aser iba totuyuba nung Guayaquil tepuokdak alirtemi rongrong mapang nok-nü amshi aser gas tanks tem nung mi senloktsü ta shia liasü.

Iba aziokdoshi nung nisung ka tekolak tangzüka yok, ta tiri

"Bendanga agütsür maneni meranga inyakba ajanga asen dak nungi tesunep bener aoba meyipa agitsü. Iba tongpang akoktsü atema asenok taoba mapang dang nungi tali telungjemba asütsüla," ta Lasso-i taoba mapang Twitter ta ajaba social media sapang X nung ashi.

Tiri iba sangdong agütsür ghonda ishika lir Esmeraldas yimti nung rongrong adokba osang sangdong, kong prison guards 15 aser danga staff ana tepuokdak tesem ka nung pua ayu, ta sorkari ashir.

Esmeraldas kisüng nunga police unit ka amak, gas stations nung tapoktsü oset yutsü aser gari kar rongdoktsü.

Tang tesüsaba sangdongba emergency ya Lasso-i tesüiba ghonda 24 tsüngta tanaben sangdonger alitsü.

Ecuador yimtiba Quito nungi southwest tsütsü mile 250 shi pilar rongnendak Manta yimti indang mayor kasetba sülen Tir Lasso-i Los Rios aser Manabi province aser Duran yimti nung Hombarnü state of emergency benoka liasü.

Guayas 1 prison nung nisung 9,500 tashi yutettsü saka yangji taküm ita pezü tsüngta nisung 3,000 shi agi tali yua liasü.

Iba ya Ecuador nung tepuokdak tamajungtiba ta züngshir aser yangji gangs balala tsüngta 2021 küm raratepdang tepuokdak alir nisung 119 tepset.

FIFA Women's World Cup: Japan aser Spain na Last 16-i iogo



Chiteni/July 26, 2023 (Agencies): Tang asaya aliba FIFA Women's World Cup nung Bodhbarnü Spain aser Japan nati pei tata asaya koka last 16 atongba mezüngbuba team ana kümogo.

Bodhbarnü Spain-i Zambia goal 5-0 agi akok. Iba asaya nung Ballon d'Or anaben tashi ngur alila Alexia Putellas-a Spain team nungi asaya liasü. La temekok yiruba ajanga masayateti arur tang asaya tenzükogo.

Bodhbarnüsa Costa Rica goal 2-0 agi akokba sülen Japan team knockout rounds-i taier dang liasü aser Spain-i takok anguba ajanga team anaprola taruba round-i ayong ayonga iogo.

Japan aser Spain na Hombarnü asayaba sülen Group

C nung takoker jangjatsü. Team anapronglai tang tashi nung point trokrok ngua lir aser goal ka danga chia mali. Kasa anogo Costa Rica aser Zambia na asayatsü.

Spain aser Zambia na asaya nung mezüngbuba goal ya Teresa Abelleira-i minute tekububa nung idakja liasü, koba asayamung nung goal idaktsüba tajungtiba rongnung ka liasü.

Mezüngbuba goal idaktsüba sülen minute pezü dang lir Jennifer Hermoso-ia goal ka idakja goal 2-0 aküm aser Spain coach Jorge Vilda-i Japan den asaya aser last 16 dak rangloker break nung asayartem melena liasü.

Asaya tanabuba shilem nung Hermoso-i ano goal ka idaktsü aser substitute Alba

Redondo-i Spain atema goal ana idakja parnoki asaya ayong ayonga akok.

Spain team-i mezüngbuba asaya nung Costa Rica goal 3-0 agi koker liasü.

Kasa mapang nung Japan-ia goal 2-0 agi Costa Rica ayong ayonga koka liasü. Iba asaya nung Costa Rica team nungi asayartemi aibelen kanga mena aser parnoki Japan nem asaya tepeyong kecha timtem magütsü liasü.

Iba asayamung nung Japan team-i mezüngbuba asaya nunga Zambia team goal 5-0 agi ayong ayonga koka liasü.

Asaya nung Japan team atema Hikaru Naomoto aser arishi küm 19 tain asayar Aoba Fujino nati goal kaka idakja parnoki asaya ayong ayong ayonga kokogo.

India football team tem Asian Games nung asayatsü

Chiteni/July 26, 2023 (Agencies): Sports Minister Anurag Thakur-i Bodhbarnü sangdong ka ajanga India tebur aser tetsür football team tem 2022 Asian Games nung shilem agitsü ta metetdaksüogo, koba China kübok Hangzhou yimti nung September ita asayatsü.

Anurag Thakur-i ashiba agi, iba asayamung nung shilem agitsü atema India football team temi latetja aliba criteria (continent nung top 8) metongtetaka tawa kanga junga asaya aruba temlung dang yur parnok asayatsü asoshi temelaba agütsüogo.

India tebur football team Asia nung tang jenjang 18buba nung lir aser tetsür team 11buba nung lir. Sports ministry temzüng oziung ajanga ashiba agi top 8 nung aliba team tem dang team asaya nung shilem agitsü atema temelaba agütsü.

"India nung football asaya meimertem atema osang tajung ka! National tebur aser tetsür team taruba Asian Games nung shilem agitsü. Ministry of Youth Affairs and Sports, Government

of India-i team anapronglai latetja aliba criteria metontetaka iba asayamung nung shilem agidaktsütsü atema inyakyim atsüshiogo," ta Sports Minister Anurag Thakur-i tweet asü.

"Tawa parnoki kanga junga asaya aruba temlung dang yur Ministry-i parnok nem temelaba agütsütsü telemtetba agiogo. Parnoki Asian Games nung tajungtiba asaya linük nem konang tetushi bener arutsütsü imlar," ta paisa ashi.

Iba dak sendakba nung India tebur team coach Igor Stimca-i social media ajanga India sorkar dang asayartem Asia Games-i yoktsü atema mepeshia liasü.

2002 nungi Asian Games nung football ya U-23 dang asayar aser atakzükja aliba arishi küm tema alir asemsem asayatsü melar. Asian Games nung tebur team-i 1951 aser 1962 küm gold medal nguogo aser 1970 küm bronze medal nguogo.

Hangzhou, China nung Asian games ya September 23 nü tenzüktsü aser October 8 nü tembangtsü.

Japan Open: Sindhu tsükogo; Rankireddy o Shetty na 2buba round-i iogo

Chiteni/July 26, 2023 (Agencies): India tsürtem rongnungi nungtuugu badminton asayar PV Sindhu maneni Japan Open nunga mezüngbuba round nung tsükogo. La Bodhbarnü mezüngbuba round nung China tsür Zhang Yi Man-i tsükdakja liasü.

Sindhu-i iba asaya 12-21 13-21 agi mekoki liasü, koba minute 32 asaya liasü. La taküm BWF World Tour events 13 nung tenet nungbo mezüngbuba round nung tsükogo. Taoba hopta Korea Open mezüngbuba round nung Chinese Taipei tsür Pai Yu Po-i tsükdaktsüba sülen Sindhu asayamung anabuba atonga mezüngbuba round nung tsükogo.

Taoba world champion ya yiruba sülen junga masayateti arudar aser la tang ranking nung jenjang 17bubai asepzüka lur lir. Lai tawa asaya nung aibelen kanga menar aser la dang nungi tekübokba jenjang nung aliba asayartem dena point nguteta masayateti arudar.

Sindhu tawa coach tasenba Muhammad Hafiz Hashim kübok training agi tenzükogo aser iba ajanga la asayaba yimya melenshütsü imlar.

Sindhu-i taküm May ita Malaysian Open quarterfinals nung Zhang tsükdakja liasü ajisüaka iba asaya nung

küpzüko.

Kasa mapang nung tebur tarep asayar Satwiksairaj Rankireddy aser Chirag Shetty nabo maneni kanga junga asayadar aser tenati mezüngbuba round nung Indonesia nung tarep Leo Rolly Carnando aser Daniel Marthin na 21-16 11-21 21-13 agi koka tanabuba round-i iogo.

Satwik aser Chirag na iba asayamung nung third Seeded tarep lir aser tenati taoba Deobarnü Korean Open dena kokogo. Tena tanabuba round nung Denmark nung tarep Jeppe Bay aser Lasse Molhede na den asayatsü.

Maneni tebur kija asaya nung Lakshya Sen-ia 21-15 12-21 24-22 agi külem India nung asayar Priyanshu Rajawat koka tanabuba round-i iogo. Pa taruba asaya Japan nung asayar Kanta Tsuneyama den asayatsü.

Ajisüaka tebur kija asaya tanga ka nung Mithun Manjunath, China nung asayar Weng Hong Yang-i 21-13 22-24 18-21 agi kokogo.

Tebur tarep asayar MR Arjun aser Dhruv Kapila na Aaron Chia aser Soh Wooi Yik na den asaya ajisüaka point 5-15 ta tesülen aliba mapang yiruba ajanga masayatetsüsa aküm.

MDTA-i district U-14 taekwondo team nem tetushi agütsü



MDTA ketdangsürtem den MDTA Under-14 team nungi asayartem sentong tembangba sülen tangokba noksa nung angur.

Mokokchung, Chiteni/July 26 (TYO): Mokokchung District Taekwondo Association (MDTA)-i July 26 nü district Under-14 Taekwondo team nem tetushi agütsüogo. Indria Gandhi Stadium, Kohima nung tawa state level asayamung nung takok tajung ngua asayatetba atema team nem tetushi agütsü liasü.

District team nung asayar ter aser support staff ana densema liasü. Iba asayamung nung Sentimmoa Ozukum aser Temsumongla Longkumer (Ladybird School) nati weight category balala nung bronze medal ngua liasü.

Medal angurtem nem sen, medal aser kuli kakat agütsü liasü

aser asayamung nung shilem agirtem nema kuli kakat agütsü liasü. MDTA-isa, district nungi asayar ajak nem taekwondo unfirom agütsü liasü. Sempet aser kuli kakat ya MDTA tir Supongwati Jamir-i lemja liasü.

Kasa mapang nung MDTA general secretary Nukshi I. Ozukum, shiba lenisüba nung sentong agia liasü, pai state level asayamung nung takok ngua asayaba atema district team nem tenüngsang agütsü. Pai ashiba agi, taekwondo ya kanga dang discipline asaya ka lir aser bendanga agütsü asayartem atema temaba jenjangi atutsü atema lenmang sadema lapoka lir ta ashi.

Paisa, Association-i

asayamung balala ajanga parnok ajungkettsü atema takokba tashi inyaktsü ta shia asayartem dang tarutsü nunga tajungtiba asayatsü merangtsü ajungshia liasü.

Sentong nungsa o tatsüka jembiba mapang MDTA Executive member, Bendang-i, association züngsemtem aser talisa Team Manager, Coach aser asayartemi district atema tenüng tajung bener arutsüba asoshi parnok nem tenüngsang agütsü. Pai ashiba agi, training agitsü atema mapang peria meliaka asayartemi takokba tashi tajungtiba asayaogo aser district atema tenüng tajung bener arutsüogo aser iba ajanga tarutsü nung tangartem ajungmesotsü, ta ashi.

Sentong tembangba sülen MDTA ketdangsürtemi multipurpose Indoor stadium Mokokchung nung tang agia aliba boxing camp semdang aser Boxing Association Mokokchung ketdangsürtem den sensaksema liasü.

BILEMDANGANG

"Ajemalubaji tashimaitba temaitsü masü."